

四庫全書

集部

欽定四庫全書

集部

誠意伯文集卷五

詳校官庶吉士臣范逢恩

中書臣劉源溥覆勘

總校官編修_臣王燕緒

校對官編修_臣秦泉

謄錄監生_臣秦鴻甲

欽定四庫全書

誠意伯文集卷五

明 劉基 撰

覆瓿集五

近體詩

寄題昇元觀綠筠軒

帶郭軒楹映綠筠，八牕瀟灑總宜人。
風生密葉蛟龍舞，露下寒梢翡翠勻。
不待剪裁調律呂，若為惆悵憶伶倫。

五城雙闕煙塵隔且傍林巒寄此身

送李子庚之金陵

舍下微波湧碧鱗湖邊草色可憐人也知使者徵書急
莫厭輕舟出郭頻春酒盈缸清似水時魚帶子白於銀
山桃野杏能紅紫醉眼相看意自真

欣懷亭二首為脫因宗道賦

欣懷亭子湖山上山色湖光八面開恰似崑陵積石圃
湧出王母閨風臺驪龍夜靜擎珠上神女天寒委佩來

何日扁舟一繫纜高躋絕頂望蓬萊

愛子山亭湖水中雜花脩竹合蒙龍
三春錦繡花迎日
十里笙簫竹度風
菰飯炊來勝雪白
鯉魚釣得出波紅
浮生無事當為樂
應許閒人一醉同

送趙元舉之奉化州學正

東風吹雪作春波
送客中流發棹歌
酒至莫辭狼籍醉
情深無奈別離何
天童山杳嵐光暝
佛手江長海氣多
泮水紫芹香可攬
倚看衿佩樂菁莪

次韻追和音上人

絕頂浮雲瑣石關，曲途危磴阻躋攀。
他年甲楯孤臣泣，此日齋鐘老衲閒。
夜永星河低半樹，天清猿鶴響空山。
干戈未定歸無處，擬結茅廬積翠間。

題王起宗御史江山烟靄圖

繡衣御史乘驄暇，貌得江山烟靄圖。
日落風雲連紫極，天寒波浪隔蒼梧。
魚龍縱壑深無底，猿鳥歸巢暝不呼。
羈旅傷心緣百感，可堪回首憶吾廬。

二月二日登樓作

薄寒疎雨集春愁
愁極難禁獨上樓
何處山中堪採藥
幾時湖上好乘舟
銜泥客燕聊相傍
泛水浮萍可自由
見說蘭亭依舊在
於今王謝少風流

次韻和王文明絕句漫興十八首

芙蓉湖上夕陽低
楊柳枝頭一鳥棲
獨倚闌干看山色
白雲飛過若耶溪

年華如水去堂堂
何處無愁不斷腸
天上羣仙風外雨

人間明月夜淒涼

解印淵明柳映門
床頭酒盡卧空尊
牕風吹破羲皇夢
閒看山雲起石根

竹根草葉垂書帶
苔面蝸涎學篆文
坐到博山香燼歇
不知新月出微雲

眼見繁花開滿林
即看嫩葉綠成陰
杜鵑啼落西山月
一夜相思萬里心

澹澹輕風冷透衣
冥冥細雨客思歸
若為化得遼東鶴

遠逐浮雲汗漫飛

天邊雲氣來須女湖上輕雷起少男一陣微涼疎雨過
滿池蓮蕊綠如簪

風翻竹籜空林響雨絕蛛絲落蕊縣長日掩關無客到
一眉山色對嬋娟

江北江南幾驛亭可憐彊半草青青夜涼月白西湖水
坐看三台上將星

舊遊何處渺煙蘿幾度相思夢玉珂莫向天涯苦回首

野猿木客恣經過

東海鯨鯢倒百川
西江波浪阻征舡
誰能散髮空山裏
學取希夷石上眠

夢裏分明到廣寒
夢回月落斗闌干
碧桃吹盡無人覺
滿袖西風涕泗漣

曉晴何處一黃鸝
飛上花枝款款啼
獨坐小窗歌伐木
偶然懷古憶祈奚

釣得槎頭縮頸魚
隔牆有酒貫錢沽
近來酒價如珠玉

獨飲千錢不要扶

樓頭新月鬪弓彎
樓外青山對客閒
深夜忽然思往事
夢隨孤鶴遶雲間

一自江淮作戰場
城池無處不金湯
轅間須識黃公畧
莫與蕭娘競粉粧

草廬不枉達官車
長日惟消滿架書
睡足北牕清似水
數聲殘角起城烏

故鄉蛇豕滿柴荆
異域風塵嘆此生
至竟迂狂成濩落

可憐天地一浮萍

發紹興至蕭山

落日牛羊下綠坡微風短櫂拂晴莎窮愁白髮真相得
悲感青春最苦多水暖荻蒲沙鷀集月明洲渚榜人歌
此時忽漫思身世奈爾桃花滿眼何

宿蠟燭菴俊上人房

城外春江動客愁江邊細草綠悠悠還將短髮臨岐路
畏向東風憶舊游斜日遠天歸雁急薄寒孤館落花稠

青燈不放還鄉夢一夜腸回一萬周

二月七日夜泊許村遇雨

漫喜晴天出北門還愁急雨送黃昏
山風度水喧林麓野樹翻雲動石根
宿麥已隨江草爛新泉休共井泥渾
魚龍浩漫滄溟濶澤畔誰招楚客魂

嘉興寄王昌言學正

去年相別雁來初今日相思柳拂渠
對酒放歌難再得登高作賦近何如
黃華燼燼輕煙裏碧草油油小雨餘

欲棹扁舟尋逸少為愁妨寫換鵝書

感懷二首

新晴楊柳散春絲長路行人有所思
愁上容顏青鏡識寒生亭館落花知
高雲送雨來無定獨鳥驚風去自遲
悶對亭前紫荊樹同根那得却相離

不到西州又十年青山白水獨依然
徒聞雞狗供輸盡無那干戈迤邐延
天上九霄空玉燭人間萬井共貪泉
草中攫取雲中送坐待連茹紫闥邊

寄臺郎張質夫

春愁忽得故人書，喜極成悲淚滿裾。
冀野鴛鴦虛伯樂，魯門鐘鼓駭鷓鴣。
全家蕩析飢寒切，病骨支離志慮疎。
敢以浮名誤知己，絨辭寫意愧何如。

水西寺東樓曉起聞鶯

日上高城柳影齊，風軒臨水看鶯啼。
初來木杪鳴相應，稍入花間聽却迷。
芳草自深勾踐國，行人猶隔御兒溪。
思家每恨無輕翼，可對鶯華不惜悽。

茶園別朱伯言郭公葵

細水吹烟送客舟，離情恰似水東流。
此時對酒難為樂，何處尋春可縱游。
去雨來雲天渺渺，輕蜂亂蝶日悠悠。
絕憐短髮無聊賴，一夜如絲白滿頭。

二月二十三日自黃岡還杭途中作

日照江邊春樹林，繁花亂葉感人心。
花間蛺蝶漫多事，葉底杜鵑非好音。
舉目山川成皓首，側身天地一沾襟。
解憂惟有尊中酒，疾病年來已厭斟。

晚泊海寧州舟中作

春霧今宵氣稍清
空江一舸客心驚
東流濁浪衝山動
西望長庚似月明
不有龔黃為郡縣
徒令耒耜化戈兵
溥天何處非王土
無地安身愧此生

憂懷

羣盜從橫半九州
干戈滿目幾時休
官曹各有營身計
將帥何曾為國謀
猛虎封狼安薦食
農夫田父困誅求
抑強扶弱須天討
可怪無人借箸籌

春興七首

柳暖花融草滿汀
日酣烟淡麥青青
枝間好鳥鳴求友
水底寒魚陟負萍
異縣光陰空荏苒
故鄉蛇豕尚羶腥
感時對景情何極
悼往悲來總涕零

忽聽屋角聞晨鳩
起看園林綠漸稠
小雨霏霏涵日過
新泉細細入河流
殘花斷柳虛歸計
遠水他山聚客愁
鴻雁南飛限蒼嶺
傷心何處問松楸

於越山城控海壖
春風回首忽經年
憂時望月青霄迥

懷土登樓白髮鮮江上波濤來渺渺雲中鴻鵠去翩翩
暮寒細雨餘花落夢遶天涯到日邊

會稽南鎮夏王封蔽日騰空紫翠重陰洞烟霞輝草木
古祠風雨出蛟龍玄圭此日歸何處玉簡他年豈再逢
安得普天休戰伐不令竹箭困輸供

卧龍山奠越王都羣水南來入鏡湖苦怪桑田非舊跡
還驚雉堞是新圖白波翠靄浮天際綠樹青莎到海隅
便欲投身歸釣艇不知何處有蓴鱸

深春積雨感年芳暮館輕寒透客裳翠柳條柔先改色
紫蘭花冷不飄香山中虎豹人烟少海上樓臺蜃氣長
燕子新來畏沾濕一雙相對立空梁

憶昔江南未起兵吳山越水共知名蘋萍日暖遊魚出
桃李風和乳雁鳴紫陌塵埃嘶步景畫船歌管列傾城
于今征戍誅求盡翻對鶯花百感生

雨中遣懷

青春苦寒雨太多野水極目似秋波湖上芳草生已遍

山中美人愁奈何思家無計鏟荆棘避地只恐觸蛟鼉
落花零亂晚風起坐看城頭烏尾訛

送岳季堅入計籌山

陽羨先生故將孫拂衣高蹈入玄門甕盈五粒松花酒
食有千年枸杞根自得詩篇留客誦頻來猿鳥識人言
浮雲富貴非吾愿此意陶公可與論

為賈性之題山水圖

不見唐朝王右丞世間畫史少知名何人貌得烟嵐意

靜聽如聞風水聲
遠岫帶雲纔隱約
斜陽照樹却分明
青泉素石堪乘興
欲買扁舟過此生

題雪竹圖

雪壓江邊脩竹林
沅湘晚色起愁陰
川光蕩漾空清闊
山氣玲瓏太白深
未得捎雲邀鳳宿
可能映水學龍吟
無人谷裏吹春律
直節虛中恐不禁

題脩竹圖

九疑山下湘江畔
多少篔簹覆碧湍
自有清陰堪解慍

也能結實待棲鸞
濛濛暖翠晨烟合
顆顆明珠夕露溥
長日焚香對圖畫
青冥風雨共淒寒

題畫蒲萄卷子

西域蒲萄也自奇
畫圖驚見墨淋漓
迎風翠羽幡幡動
帶露玄珠纂纂垂
此日散愁思釀酒
幾回病渴想如飴
春牕隱几成幽夢
應共張騫到邳支

蕭山山行

積雨今朝天氣佳
山亭曉色上林花
未須汗漫思身世

且可逍遙翫物華
偶值斷橋妨去路
却隨脩竹到隣家
籬邊野鴨驚人過
撥刺飛鳴落遠沙

題明皇幸蜀圖

斜陽慘淡照霓旗
石棧縈紆僕馬羸
想得林間子規鳥
斷崖青壁亦相隨

裂帛聲中發禍機
白華歌斷草菲菲
可憐蜀道三軍恨
不記他年武惠妃

題柯敬仲墨竹

蒼龍倒掛不入地回首却攀雲上天夜深雲散明月出
化作脩篁舞翠烟

蕭山任氏山堂

新堂結構倚巖阿地僻無譁樂事多日上黃鸝鳴翠竹
雨餘紅鯉躍清波消除暑氣憑松柏舒卷煙嵐任薜蘿
珍重主人能愛客衰顏聊復為君酤

以紈扇贈奎上人并寄以詩

新裁紈扇如圓月寄與靈峰奎上人不共青蒲爭巧拙

好將白氎伴清新薰心炎暑誰能敵應手涼風自有神
莫怨秋來藏篋笥明年朱夏更相親

靈峯寺棲雲樓

靈峯之中樓倚山山雲日夕棲其間九霄雨露隨高下
六月風雷送往還青嶂曉光浮藻梲銀河夜氣濕松關
天台向上無多路鷺嶺烟霞此可攀

題瑞上人山水圖

上人性僻耽山水應是王維第二身蘭渚流觴新到越

藍田別業舊通秦
驅馳翰墨迴龍虎
簸弄風雷感鬼神
羈旅相逢聊自慰
莫思天地有煙塵

普濟寺遣懷

江上西風一葉黃
莎鷄絡緯滿叢篁
物華乘興看都好
時序逢愁速不妨
露下星河光潋灩
月明巖谷氣清涼
願聞四海銷兵甲
早種梧桐待鳳凰

崇福寺壽上人看山樓

為愛山中世事疎
看山終日坐茅廬
林花澗草香無際

翠壁丹崖錦不如禹穴風雷翻石鵝耶溪波浪動金魚
此時應悟幽棲樂底用凌雲獻子虛

宗上人溪山亭

湖上清溪溪上山山亭結構俯人寰窗中樹色宜晴雨
門外灘聲自往還鍊藥井寒玄鶴逝采蓮舟去碧波閒
春蘭秋桂年年好憔悴風塵漫厚顏

題水墨蓼花草蟲

為有江頭紅蓼花秋來獨作草蟲家尋香粉蝶應隨夢

採蜜黃蜂不趁衙
絡緯語殘涼露滴
蜻蜒立困晚風斜
畫圖水墨驚初見
却似扁舟過赤沙

題山水圖為寶林衍上人作

雨過秋山日欲暝
白雲如雪擁山根
高松灑露和烟冷
迸水穿沙出谷渾
擬向蘿陰緣石徑
却尋花片入桃源
畫圖應有通神處
他日相從子細論

次韻和新羅嚴上人秋日見寄二首

露冷風清木葉疎
蓼花莎草沒階除
子雲詞賦空投閣

仲蔚蓬蒿漫索居羣盜只今齊得意故鄉從此遂無書
鏡中短髮非松柏歲晚看看不似初

愛汝精藍抱翠微青松綠竹共依依龜臺落日明霞綺
鰻井寒湖長石衣銀杏子成邊雁到木樨花發野鷺飛
鐘殘永夜禪心定一任秋蟲促杼機

重用韻答嚴上人

坐見風霜百草疎却憐光景漸消除萍蓬飄蕩三年客
松菊荒涼五畝居陋巷蒼苔封蟻蛭空庭黃葉帶蟲書

江楓恰似知人意強學芳菲二月初

江水東流西日微閒身不繫獨何依塵埃爽颯枯蓬鬢
霜露淒涼破衲衣百粵雨餘山翠合三韓雲淨海青飛
滄溟自古通天漢夢繞黃姑織女機

再用韻答嚴衍二上人

厚祿故人音問疎天官不擬介推除莫思浮世塵埃事
好共深山木石居月滿高樓留客話燈明寒榻課兒書
城頭鼓角沈沈夜腸斷鄉關入夢初

蔓草萋迷野色微
嗷嗷鳴雁欲誰依
殘花露淡胭脂靨
落木霜凋薜荔衣
萬國舊聞車軌一
九州今見劫塵飛
總戎安得英雄將
不放龍蛇起殺機

復用韻答嚴上人

閉門無事往來疎
窗外從他草不除
食肉已忘三月味
謀身欲去九夷居
人情自古懷鄉土
天下何時罷羽書
莫向西風苦惆悵
白雲流水只如初

西風吹樹夕陽微
斥鷃鷦鷯各有依
幕府三千雙短鬢

鄉關千里一沾衣
江淮渺渺人烟少
梁楚茫茫鬼燐飛
誅暴保民黃石畧
將軍莫自失戎機

仍用韻酬衍上人

多愁祇覺世情疎
愁極憑誰與破除
江海烟塵羈客淚
雲山桑梓別人居
高風斷雁惟將恨
衰草殘螢不見書
世亂弓刀方有用
休誇新句逼黃初

歲莫天寒生意微
空林鳥雀自相依
有情霜葉欺花貌
無用風荷象客衣
西塞鼓鞀山岳震
東郊羽檄海波飛

傳聞有詔頒南服早晚陽和幹化機

又用前韻

樹頭寒月影扶疎天上清霜下玉除
紫塞風高鴻失路碧梧枝冷鵲移居
虎頭曠日縻倉粟牛腹中霄詫帛書
見說抱關堪避世裨官猶可學虞初

西風吹面雨霏微片片浮雲水上依
鴻雁羣翔營口實鳬鷺對立惜毛衣
關河慘烈時將晚原野蕭條葉自飛
慚愧江湖一萍梗厭聽咿軋響隣機

題寒林圖

搖落江邊秋樹林
淒涼久客二毛侵
藤蘿歲晚龍蛇死
鼓薄天寒虎豹深
流水斜陽人遠近
青烟白草雁飛沈
桂花自在山中發
悵望西風起夕陰

題訪隱圖

忽憶山中陶隱居
杖藜衝曉謁茅廬
林花浥露紅無比
澗草含烟綠有餘
金鼎丹光纏日月
銀河流水到階除
松間白鶴通人語
長向瑤臺寄遠書

題風中水仙花圖

癡妬封家十八姨，不爭好惡故相欺。
沅湘日暮波濤起，翠蕩瑤翻欲渡遲。

題小景

江頭日日起西風，江樹驚寒葉變紅。
天澹雲低何處雁，一行飛下荻花中。

題梅花小禽圖

三鳥翩翩海上來，一雙飛去入瑤臺。
可憐鍛羽空山裏，

獨立寒枝怨野梅

題湖山烟雨圖

湖上青山烟雨寒
湖中一棹欲歸難
白蘋自老東風裏
腸斷黃昏獨倚闌

若耶溪上雨聲來
秦望山前霧不開
欲渡鏡湖尋禹穴
蒼藤翠木斷猿哀

宿賈性之市隱

今年冬雨不作雪
屋頭鳥聲渾似春
絕憐草色綠鋪地

可愛梅花白照人時物已迎新歲換交情空向異鄉親
忽思昨夜殘燈裏錯認還家夢是真

題陸放翁湖上詩後

放浪江湖一老翁若耶溪上幾春風門前流水斜還直
籬外閒花白復紅甚欲賦詩追杜子也能縱酒學陶公
細看墨蹟成懷古歎息他鄉一斷蓬

次韻和孟伯真感興四首

五載江淮百戰場乾坤舉目總堪傷已聞盜賊多於蟻

無奈官軍暴似狼
綠水青山人寂寂
長烟蔓草日荒荒
弟兄零落音書絕
腸斷春風一雁行

無用文章豈療飢
勞生筋骨已支離
窮愁杜甫家何在
落魄陳平計未奇
草澤狐狸三窟固
江湖波浪一帆危
故園春色年年到
綠葉紅花好為誰

平時盜賊起成雲
厚祿能忘愧庶民
樽俎自高廊廟策
經綸不用草茅人
思家遠道風塵惡
爭食空山虎豹嗔
莫怪洛陽年少客
持書痛哭向楓宸

多事繁花白映紅無愁細草綠浮空春秋迭代人先老
天地生成意不窮鳳鳥長辭西嶺樹鯨魚自起北溟風
幾時學得玄真子若笠蓑衣一短篷

次韻張德平見寄

漠漠長烟野色昏霏霏細雨濕衡門乾坤象緯尋常轉
江海波濤日夜翻賈誼奏書哀自哭屈原心事苦難論
近逢使者徵遺逸說道巖廊納讜言

題承天觀

吳山頂上承天觀，玉牒金符鎮地靈。
百尺樓臺依斗極，九霄風露出牕櫺。
江聲洶湧蛟龍闕，雲氣虛無翡翠屏。
見說蓬萊恰相對，仙凡只在隔滄溟。

感興三首

病骨愁寒憶見春，及觀春色却愁人。
轉添細草當門徑，不惜穠華委路塵。
去國杜鵑紅淚盡，傷時庾信白頭新。
風波滿地鷓鴣鳥，相趁銜魚飽一身。

二月江南雪片飛，吳山寒色動征衣。
莫尋花徑防泥滑，

且掩衡門待日晞
弱柳先舒應自損
蟄蟲已出更安歸
乾坤處處旌旗滿
肉食何人問采薇

春院微風柏葉垂
朝寒坐看雀爭枝
娟娟墜雨拋蒼蘚
點點輕花赴綠池
景物關情悲自老
江山滿目惜時危
長生應有真仙訣
漫把黃金駐黑髭

有感

浪動江淮戰血紅
羽書應不達宸聰
紫薇門下逢宣使
新向湖州召畫工

感歎

聞說蘇州破倉皇問故人死生俱可悼吾道一何屯北
去應無路南藩自此貧淒涼轉蓬客淚盡浙江濱

題畫魚二首

為愛濠梁樂有餘故拈兔穎寫成圖秋風忽憶銀絲鱸
腸斷松江隔具區

九罍無人詠鱖魚河墳有客歎牂羊不知生意能多少
爭得鯢鮓滿尺長

可歎

風雨瀟瀟曉難忍，思世事一悲悽。
當時重禁歲矛戟，今日呼令學鼓鞀。
未見爭鋒曾奏捷，徒聞却走不先迷。
劫灰日夜飛相逐，隨處空林有燕棲。

柯橋靈秘寺即景貽基上人

盡日陰陰風墜花，樓前溝水發芹芽。
青春院宇僧房好，白晝豺狼客路賒。
對坐蝦鬚迴舞燕，出門鴟尾立飢鴉。
相期握手何時再，五月芙蓉隘若耶。

次韻和石末元帥見贈二首

雨過前溪曉色新
山城草木靜埃塵
殊方負固猶蝸角
此地偷安賴虎臣
高閣綠蘿相對晚
畫闌紅藥不勝春
誰憐衰病兼疎拙
漂泊東西一旅人

元戎玉帳擁旌麾
武畧文韜並出奇
構厦可堪無大匠
安邦曾見活危基
此時山斗歸民望
他日龍鰲簡帝思
我輩迂狂乖世務
趨風執御更何疑

雨中寄季山甫二首

山雨隨風去復來南明晚色動樓臺猶憐仗節中郎在
不見乘槎使者迴感興詩成聊自遣忘憂花好為誰開
偏嫌近水多蜚蜮永夜喧呼聒夢回

長夜雨多泥沒車白日閉門人跡疎階下水衣看上壁
庭前簷溜欲成渠閒花自發無勞種蔓草從生不遣鋤
想見幽棲張仲蔚蓬蒿如樹塞園廬

陳此一作石室豫為墓地求詩作此贈之

仙都道士陳此一偷得蟾宮龍虎丹便開白石為金穴

坐待青天落玉棺
馭氣九秋風
引佩步虛五夜月
當壇他年欲訪朝真路
絳節霓幢此地看

五月二十九日喜雨奉賀石末元帥

使君設醮天
皇格道士陳章玉女開
遂遣赤松來作雨
更教玄武下乘雷
涼颼細拂花間入
潤色新從草際回
豈但農夫堪一飽
野人亦有酒盈盃

用前喜雨韻寄呈石末元帥時戍卒有不軌謀
蓄而未發公治之以意卒遂返正故發之以言

且并志祈雨有應也

將軍渡水流澌合太守彎弧巨石開但覺誠心通日月
不知生意在風雷思尊未許歸張翰結草終當獲杜回
可怪疎狂謫仙子兼旬浪飲六千杯

題畫山水

澹澹輕烟幕半林涓涓飛瀑瀉遙岑偶然坐石觀流水
不記還山路淺深

題紫虛觀用周伯溫韻

少微山直太微宮山下樓臺起半空
丹井石床纏地絡
瓊牕翠戶出天風
傳聞仙子常時到
應是神霄有路通
會待九秋明月夜
高吹鐵笛上清蔥

題紫虛道士晚翠樓

晚翠樓子好溪南
溪山四圍開蔚藍
微陰草色盡平地
落日木杪生浮嵐
巖畔竹柏密先暝
池中芰荷香欲酣
聞說仙人徐泰定
騎鸞到此每停驂

葉叔安南溪草堂即事

溪上草堂盈十尋疎楊密竹各成陰綠烟繞舍桑畦靜
白水當門稻遂深過雨忽翻金碧影良蜩亂發管弦音
此時不省愁何在坐到鴉棲月滿林

妙成觀用何逸林通判舊韻

我訪仙家溽暑前青楓綠柳暗晴川竹根露濕登山屐
沙際鷗迎渡水船雲氣長留虛白室丹光直上蔚藍天
純陽道士重來日為問蓬萊是那邊

廢雲山堂有感

堂在府治聽事後
郡守退食之所

雲山堂畔垂楊柳曾見新堂結構成一吏傳言奔里役
幾家掩淚輟農耕花明粉黛春開宴月照樓臺夜按箏
破瓦斷磚今滿地綠莎青草為誰生

題米氏小景二首

日上春風紫翠重烟含汀樹淡還濃夜來水漲溪橋斷
應是雷霆起蟄龍

春霧昏昏雨散絲溪流拍岸小橋危猿啼鳥叫山鬼出
正是行人腸斷時

題安石蒲葵圖

東山尊騎出巖阿能使枯蒲貴綺羅却恨卞和無祿位
中宵抱玉淚成河

題滄江獨釣圖

山繞滄江一釣船又隨斜日下長川小魚不食大魚去
風定遠林生白烟

題二喬圖

江上桃花紅粉腮偶然吹入玉堂來東風日暮和烟雨

多少飄零委綠苔

次韻和石末公七夕詩

天上傳聞會兩星
清秋夜色湛玄冥
蚌胎隱見銀蟾窟
鵲翼高低玉女輶
一水經年纔解后
七襄終日豈神靈
勞生厭事惟思睡
獨卧無心覲帝青

再和倒用前韻

天官垂象煥空青
會合徒聞帝子靈
三武夜開千石簾
兩旗晨轡七香輶
房帷瓜果紛祠祀
霄漢雲霓恐晦冥

惆悵多憂江海客登樓獨自看台星

病足戲呈石末公

昊天容我作支離病瘥纔除足就羸跬步不妨猶似鼈
蹕行那得更憐愛抱珍獻楚何堪再斫樹收龐亦未遲
塞叟于今知匪禍周難從此免為犧

遣悶呈石末公

公庭春樹秋重綠但見鴉鵂日日鳴不雨正當三伏熱
看雲無奈百憂生草間羣盜俱靡爵天下何人尚力耕

漢法幾時還再復白頭猶得詠昇平

庭前萱草花落已久至秋復開感而作詩東石

末公

露下蛩鳴寒氣催蒹葭葉響雁歸來鬢毛已為憂生白
護草何須晚更開嫋嫋悲風吹落木炎炎赤日走黃埃
干戈未了仍饑饉人事天時總可哀

次韻和石末公閔雨詩

騰雲降雨指龍功况復山川祭秩隆豈意愆陽為沴氣

忽過炎夏到秋風
祈年勞酒儀徒備
登穀嘗新望已空
享祀未應無報侑
可堪不殺待時豐

再用韻

旱魃為妖殄歲功
田疇龜坼徧汙隆
無多過雨纔鳴葉
不定行雲又逐風
蔓草荒烟秋社迥
黃沙白草暮江空
愁來漫憶淳于祝
却愧靈示享祀豐

次韻和石末公閔雨詩

風悲槁葉落玄圭
水涸焦根斷埴泥
擊竹漫誇方外術

憂銅虛聽澤中嘶非關東嶽封猶濕自是西郊氣不躋
見說溪潭最深處有人徒涉只平臍

旱天多雨意五首呈石末公

旱天多雨意雲日氣恒陰草木焦枯盡蛟龍伏匿深移
家愁地蹙經國恨年侵已矣商巖叟無人解作霖

旱天多雨意炎夏已清秋虛北空蒸鬱高圓迥獨浮下
田應脯蚌深樹且鳴鳩向夕星河影稀疏恰近樓

旱天多雨意散漫起重陰漸變峯巒狀還搞錦繡文龍

應愁病暍烏亦念將焚碧落高無極人間叫不聞

旱天多雨意炎燎發洪爐事急徒號梗謀窮漫曝巫王
征愆節制民望失來蘇原籍看如赭哀今鹵掠無

旱天多雨意雲起旋隨風澤氣沈沙白山嵐過野紅乾
坤愁夢裏日月戰塵中漫說生生理如何亦有窮

次韻和石末公旱天多雨意五首

旱天多雨意雲合又還晴苦熱連三伏微涼入五更青
山黃葉遍白水紫烟生旦夕霞標起依稀對赤城

旱天多雨意霞起衆山光日月躔陽道雷霆伏大荒躍
淵無黑蜮在牧有夷羊萬室俱如燬何人尚閔阻

旱天多雨意一望百憂侵海沸羲和日山藏傳說霖南
河那可決北斗不能斟歎息還搔首清商已滿林

旱天多雨意悽惻望鈎陳哀籲何時達愁眉盡日顰乾
坤三島浪歲月兩淮塵莫問和調事嗚呼畎畝人

旱天多雨意陰電繞空湫暴客馮高壘良農死瘠丘干
戈猶未息災沴復何尤軫望成衰疾那堪數倚樓

題石末元帥扇上有陳太初畫松

老松根幹如鐵石般匠不知空谷深永夜高風吹萬竅
商聲滿地作龍吟

題渭橋圖

百載平城憤未銷武皇赫怒屬天驕可憐陵樹秋風後
貂帽駝裘拜渭橋

皆春亭

草色青青日色黃暖烟烘露百花香曉窗夢入桃園去

驚覺啼鴛在綠楊

移梅亭

貫石稍雲一樹梅誰教移向畫堂栽月涼夜色清如水
其那樓頭玉笛哀

題趙仲穆畫眉圖

有美清揚婉且閒橫雲吐月鬬彎環平生不識張京兆
却對粧臺寫遠山

含黃茹管細相和語困春風意更多驚起佳人應有恨

雙蛾感損不成歌

以梨餉石末公侑之以詩

山人見餉含消實青紫相排箇箇圓共道解煩同絳雪
也知止渴勝甘泉種從漢武樊川得名並張公大谷傳
珍重使君方閔雨急須走送滌熬煎

遣悶東石末公

綠楊落盡白楊枯坐石徒令歲月徂尚想藩臣知患盜
豈期驛使似投巫當時杭稻通遼海今日風濤隔具區

豺獮可堪專節鉞衣冠何以拔泥塗

次韻和石末公中秋不見月詩

一年明月中秋好萬里長空此夜陰
雨暈青燈昏遠思蟲鳴黃葉亂鄉心
見愁盜賊氛猶惡莫怪乾坤氣尚淫
便欲捫蘿上天柱九霄風露恐難禁

次韻和林彥文在縉雲見寄

千年井邑化為墟滿眼荆榛塞路衢
雞犬真成上天去神仙不復好樓居
風凋野樹無棲鳥水落池蓮有涸魚

欲訪軒轅問消息
大微風雨隔清都

題小畫

夕陽山下水鱗鱗
一葉輕舟釣白蘋
漫道江湖堪浪跡
荻花風雨更愁人

惆悵二首

紫薇花樹小樓東
日炙霞蒸似錦紅
過了春風到秋露
可堪零落碧苔中

與君為別幾清秋
鴻雁來時輒上樓
今日倚樓無雁過

斷腸風水隔瀛洲

妙成觀道士劉雲心挽詩

少微星下葬神仙白玉樓中迓翠輶
弟子焚香玄鶴逝天官肅駕紫鸞翩
金丹縹緲空山月鐵笛淒涼遠樹烟
溪上故人如見問碧桃花裏過年年

次韻和石末公聞海上使命之作因念西州愴
然有感二首

巫閭析木天空濶桐柏終南水亂流
邑里蕭條無吠狗

田疇蕪穢少耕牛萋萋蔓草隨人遠
淡淡殘陽向客留
遲暮飄零偏感舊幾迴垂淚睇神州

大閘尋常棄鄭師役人休望及瓜期
豺狼封豕咸登用
城郭丘民委若遺曾見羌夷皆內地
忍聞淮濟是邊陲
經綸事業君當念說道任囂髻已推

再用前韻

常聞星宿能環拱未見江河解逆流
無肉可供徐勉狗
有弱空啖景升牛梧桐冷落鸞先逝
蘆荻蒼茫雁獨留

蘇息疲氓還有術那無一斗博涼州

弟子輿尸漫有師圮橋誰共老人期龍魚並出應難識
樗櫟無庸幸見遺每上樓臺瞻北極願聞波浪帖南陲
吳山越水元相接莫更中流下鐵椎

驛傳杭台消息石末公有詩見寄次韻奉和并
寓悲感二首

被讒去國終思楚厚貌深情漫劇秦未識龐萌真老賊
妄期侯景作忠臣池魚幕燕依棲淺軒鶴冠猴寵渥新

何處荃蘭不蕭艾種蔬猶得養閒身

喪亂如川未有涯悲風滿地是蟲沙
衰遲兩臂從生柳疾病雙眸但墮花
暗蟬寒蟬秋色老丹楓紫菊夕陽斜
頗聞四國思郇伯尚想詩人賦木瓜

再次韻二首

南州昔日稱三楚西國今聞又一秦
有爵與縻亡命賊無才深愧具官臣
青冥鸞鳳風塵隔畫省貔貅服色新
張望令人憶李郭誰能匡濟想捐身

深秋蔓草接天涯極目飛鴻沒遠沙
綠水青山長送日
汀蘭岸蓼各生花風來西塞雲陰合
濤落東溟蜃氣斜
歎息笙歌舊亭館壞垣叢棘老王瓜

次韻和石末公感興見寄

使君學術似文翁弈世流芳緝武功
赤芾青衿來燕喜
黃童白叟望車攻筆端波浪翻三峽
旗尾龍蛇動八風
慚愧謏才多謬誤憂時獨有此心同

次韻和石末公無題之作

秋風嫋嫋作商音落葉枯荻日夜深已為抵烏投白壁
徒勞點鐵翼黃金軒轅未必迷襄野夸父終當死鄧林
笑撚東籬菊花蕊天寒歲晚爾知心

次韻和石末公九日見寄

去年見雁思鄉里今歲還鄉雁不來此地淒涼逢九日
何時清切覩三台莞茅夜冷蛩螢急未黍秋空鳥雀哀
避難無勞效桓景巢居隨處壓崔嵬

陳太初充兵應點作詩戲之

無僕無臺一老儒數間茅屋近通衢忽聞巷長呼排甲
急換戎裝出荷戈就列敢辭長雨立隨羣獨作沒堦趨
西風鼓角秋宵永明月青髯是白鬚

次韻和石末公開讀有感

百年萬國奉王正相業臺綱屬老成山海若時共職貢
郊原何處有戈兵廟謨可使歸權倖祖訓由來重變更
欲叫天關無羽翼拊心長嘆不勝情

秋夕有感東石末公

獨立西風聞暮蟬
起看時物愴流年
星臨野樹輝輝動
露出庭莎的的圓
無奈素絲侵綠髮
却嫌黃菊似金錢
烟塵滿眼難回首
惆悵高堂坐細氈

題小畫

庭前綠荷葉香氣
濃於酒疎雨忽飛
來的
皦明珠走

春晚

疎雨隨風過輕寒
薄暮歸猶憐數花
朵辛苦駐春輝

遣興

於越三年客思家一百旬如何今夜月却憶鏡湖春

次韻和石末公自訟之作

綠駟驂驪不服驂王良造父亦難堪
羨君名重中台上
勲業終光北斗南
露井淒風殘
綠少霜林落日亂
紅酣
侯封職在同藩
屏班爵無勞阿伯男

立冬日作

忽見桃花出小紅
因驚十月起溫風
歲功不得歸顓頊
冬令何堪付祝融
未有星辰能好雨
轉添雲氣漫成虹

蝦蟆蛭蝶偏如意旦夕蜚鳴白露叢

丙申歲十月還鄉作

溪上寒山淡落暉溪邊風送客帆歸故家文物今何在
平世人民半已非華髮老翁啼進酒蓬頭稚子笑牽衣
自嗟薄質行衰朽未覩明廷賦采薇

風急霜飛天地寒草木落水泉乾千村亂後荒榛滿
孤客歸來拭淚看野宿狐狸鳴戶外巢居烟火出雲端
黍苗處處思陰雨王粲詩成損肺肝

故園梅蕊依時發，異縣歸人見却悲。
花自別來難獨立，人今老去復何之。
未能荷鍤除叢棘，且可隨方著短籬。
等待薰風暄暖後，枝間看取實離離。

手種庭前安石榴，開花結子到深秋。
可憐枝葉從人折，尚有根株為客留。
枳枸悲風吹白日，若華高影隔青丘。
壞垣蟋蟀知離恨，長夜淒涼弔獨愁。

舍北草池寒已枯，草中時復見菰蒲。
濫泉感沸無留鮒，弱藻蒙茸不繫鳧。
綠葉紅花空代謝，春蛙秋蚓任喧呼。

窺臨最憶琴高鯉騰駕風雷定有無

小舟衝雨清溪上雨密溪深宿霧昏游子到家無舊物
故人留客數空尊荒畦蔓草纏蒿草落日青猿叫白猿
語罷不須還秉燭耳聞目見總銷魂

五載辭家未卜歸歸來如客鬢成絲親知過眼還成別
事勢傷心不可思且喜松楸仍舊日莫嗟閭井異前時
修文偃武君王意鑄甲銷戈會有期

冬至日泊舟戈溪

日薄雲陰雪在山野寒溪靜客舟還乾坤鞞蕩逾三載
風俗乖張似百蠻廢井衰蕪霜後白空村喬木曉餘殷
獨憐節序逢冬至不得安棲學閉關

次韻和石末公紅樹詩

紅樹漫山駐歲華玄冬驚見眼生花井陘旗幟軍容盛
汴水帆檣御氣賒春草淒迷金谷障夕陽照灼赤城霞
靡萍丹木扶桑裏惆悵誰乘博望槎

次韻和石末公元夜之作

八表流雲澄夜色九霄華月動春城
條風細細吹旗影香藹微微引漏聲
河漢虹橋應斷絕滄溟鼇足漫崢嶸
愁來更聽漁陽操獨倚闌干坐到明

石末公再賦元夕見寄用韻酬之

東方月出魚龍窟北極雲開虎豹關
渤澥青丘金作水崑崙赤岸玉為山
風光豈減常時好燈火嗟逢此夜慳
聽盡殘鐘成不寐那無飛羽入玄間

次韻和石末公見寄五絕

梗楠割截為椽杙歲暮搜材到柞薪悵望無因見夏后
再平水土叙彝倫

廟畧能回十萬夫詩書卻穀近來無何由入奏明光殿
指點山河一統圖

春滿郊原樂意融野花庭草競纖穠惟餘陵上青青柏
不向東風改舊容

越溪清水淬干將鬼魅驚啼畏夜光不共鉛刀爭利鈍
何妨玉匣且深藏

漢殿千門錦繡開不堪一夜柏梁災魯般骨朽蕭何死
腸斷無人為取材

妙成觀北亭用何逸材韻

最愛雲山滿目前更憐亭榭俯清川草深林藹迷樵徑
花落巖霏點客船碧澗金芝新出地丹崖石穴舊通天
神仙應在樓頭上翠羽霓旌下日邊

送鮑生之閩中

青青芳草夾長堤漠漠輕烟送馬蹄他日相思建溪上

棠梨花發鵲鳩啼

為王彥和賦槐堂

晉公庭上三槐樹千載流傳是德符今日耳孫思繼述
昔年手澤歎荒蕪當窗欲看屯雲葉夾徑先栽帶雨株
會見枝頭金粟蕊秋風吹送上天衢

社日偶成奉呈石末公

昔聞同社燕雞豚今見操戈競一殮松柏空壇飢鼠出
粉榆落日亂雅喧地連吳會嗟何感民是周餘不半存

疎嬾渾愁聞世事治聲有酒漫盈尊

次韻和林彥文劉山驛作詩

青泥九折度危峯翠木千章集遠風欲為流離安堡障
寧辭辛苦涉蒿蓬梧桐葉落無棲鳳荆棘枝寒有怨鴻
旦夕升虛聊望楚何時重賦定方中

次韻和余嘉賓御史見寄

二紀相思欲奮飛百年心事苦相違風塵跋涉容顏改
豺虎縱橫信使稀忽枉緘書如見面不勝悲喜却沾衣

有懷欲語無由寫
驄馬天涯幾日歸

題美人書紅葉圖

紅葉隨波豈自由
綵毫空復寫綢繆
無人解識詩中意
天上塵間總是愁

題烟波泛舟圖

舊遊憶鼓湘湖櫂
日淨風微江練平
小艇曲穿花底出
遊魚相伴鏡中行
別來漫想心徒切
畫裏重看眼亦明
素石蒼松是何處
願從巢父濯冠纓

題陳太初畫扇

一道滄江隔戰塵
白蘋風起浪鱗鱗
新亭滿眼神州淚
未識中流擊楫人

泛湖浮海兩如何
滿地悲風起白波
爭似乘槎隨博望
玉繩光裏看山河

水淨沙明一葉船
釣絲牽月過長川
五湖何地宜生理
我欲從之問計然

題太公釣渭圖

璇室群酣夜璜溪獨釣時浮雲看宮闕流水澹鬚眉偶
應非熊兆尊為帝者師軒裳如固有千載起人思

丁酉七月十四夜望月仍蝕且既而司天報亦
不至因感去年作此寄石末公

山城望月中元夜天運循環四序周顧兔又從銀漢滅
磔蟆空抱玉川憂清臺視祿當箕尾仙使乘槎隔斗牛
安得寄書憑去燕為言桂樹不勝秋

次韻和石末公月蝕見寄

涼氣開秋桂未花青天見月漫咨嗟玉毫撲朔此中兔
金背熒煌何處墓百鍊精銅纔照膽連城白壁底生瑕
誰能鼓劒披氛祲莫遣東郊馬散沙

題畫菜戲呈石末公

列鼎羔羊厭膾肥園官菜把莫嫌微年來騎士工隳突
此物人間亦見稀

即事有感呈石末公

葵藿傾心嚮大明參商瑣瑣只尋兵蛾眉欲擅三千寵

魚翼難通九萬程
貝錦笙簧鵲鳥瑞
明珠琢玉泰山輕
兩階千羽聞來格
分北猶勞聖主情

次韻和石末公感懷之作

鳳去深林鶩在庭
西風回首故山青
杞人岌岌憂將殞
楚國茫茫醉不醒
自覺艱虞多錯午
誰憐耗斁祝寧丁
金芝玉蕨甘如蜜
歲晚吾從董五經

聞盜過界首季君山甫亦蒙訪及以詩唁之

妖星何故犯奎躔
鶴上雲霄鯉入淵
冠退喜聞曾子反

書焚尚賴伏生傳
蕪酸併與青氈去
瓜苦空餘綠蔓牽
慚愧杜郊湯博士
白鹽赤米數相憐

次韻和石末公中秋翫月

一年二六團圓月
此夜光輝獨耐看
銀漢波濤三島接
玉京風露九霄寒
方欣酷暑隨時去
只恐清商促歲闌
更上南樓瞻北極
那無鴻雁報平安

次韻和十六夜月

纔圓又缺中天月
猶自寒光媚老蟾
承露仙人珠落掌

別風樓觀雪生簷玉階桂影駸駸薄金井苔花漸漸添
坐久城頭聞夜柝牢愁清興苦相兼

再次韻

永夜涼風吹碧落深秋白露洗明蟾金波灑灑將流瓦
玉礫熒熒恰近簷貝闕寒生魚腦滅龍宮氣潤蚌胎添
從軍不廢篇章事倚賴元侯智勇兼

次韻和劉宗保秋懷二首

眼見賓鴻去復回可堪雲霧隔瑤臺黃花自在山中發

青鳥何由海上來，
墻角蟲號瓜蔓索。
樹頭禽赫栗房開，
涼蟾照幙還清夜。
慚愧千村野哭哀。

蛩螢啼露作悲愁，
鵲鴉搏風樂素秋。
莫訝繫匏長不食，
亦知神劍解相求。
翰林白髮三千丈，
吏部回腸一萬周。
借問何如青白眼，
酣歌竟日為身謀。

次韻和石末公九日無菊詩

籬菊無花冷夕陽，
西風空送雁還鄉。
已妨少昊頒時令，
更阻淵明泛酒觴。
生意循環深自識，
年華逝水去誰傷。

愁來最愛霜中葉滿眼殷紅間淺黃

野行偶見紅樹悵然有感呈石末公

紅樹傷心夕照前漫山映水為誰妍樹當搖落人尤惜
人自憂愁樹不憐九譯未通青鳥使四郊猶漲綠林烟
野夫病足思休息藉草棲櫓擬晏眠

次韻和石末公紅樹詩

岸柳江蒲總戚施柏林辛苦懼金支虞人詫見炎官傘
侯騎訛傳漢將旗照水熒煌空銜貌因風飄落竟從誰

應慙若木生暘谷長駐跋烏燭崦嵫

次韻和石末公悲紅樹二首

乾坤何處非王土稂莠誰令滿大田
未掃綠林千嶂裏還看紅樹九秋前
吳宮露冷蟬何在漢苑風悲鶴自憐
却羨魯陽功德盛揮戈回日至今傳

霜與秋林作錦幃一朝霜重却全稀
坐看絕艷成塵土應悟浮華是禍機
驚鵲月明難自定窮猿歲暮欲何歸
猶憐有客期歡賞太息斯須志願違

詔書到日喜雨呈石末公

將軍鐵馬高秋出使者樓船渤海來
甘雨恰隨天詔下陣雲應與地圖開
枯黃背日紛紛落細綠迎春冉冉回
悵望山中多病客坐看烏鵲遶庭梅

感事呈石末公

前飛鷓鴣後駕鵝天濶風高奈汝何
不羨焦頭居上客空憐舐痔得恩多
深山虎豹來城市落日鼉鼉出薜蘿
雉尾可羹魚可膾白雲長自在巖阿

贈西岩道元和尚

西岩寺裏雲巢子不到人間幾十年杖錫野猿迎路側
談經山鬼拜燈前塵飛劫火青春夢雪滿長松白石眠
近得淵明入蓮社興來時復有詩篇

題王伯衡縣尹桑陰圖

漁陽太守之官後種得桑陰比召棠麥隴風微雲委甸
茅簷日暖雪盈筐倉庾過去青枝動戴勝飛來紫椹香
千載先生同此意為君重賦兩岐章

次韻和石末公漫興見寄二首

王侯古有興屠狗郎吏今無善牧羊青海風波騰罔象
紫霄氛祲翳搖光江寒逝水東流急天遠冥鴻北去長
莫笑烏鳶惡毛羽翻飛齊得逞鸞行

濟世何人希管樂隱居無處覓求羊扶桑未換暘烏彩
腐草猶爭爍火光百載承平戎馬佚七年戰伐艾菅長
長沙遷客能流涕一日須垂一萬行

次韻和石末公二絕

橐裏金多嫂自迎
穀中珠滿蚌能明
文犀亦有通靈角
天上龍顰盡可撈

徒聞彈鋏怨無魚
未見兼程貢蠟書
四海城池總完壁
只今誰是藺相如

聞鳩鳴有感呈石末公

郊原過雨東作始
枝上鵲鳩鳴可憐
此地巢居猶葺壘
他鄉去子望歸田
匡時勢異民思漢
憂國心隨雁到燕
逝水自流人自老
倚楹長憶至元年

戲和石末公催太初畫山水之作

春蠶吐絲作成蠶辛苦為人身上衣畫史等閒揮彩筆
女工顚顚倚空機高堂素壁峰巒出暮雨朝雲夢寐歸
可怪唐朝杜陵老瘦妻短褐有光輝

和石末公冬暖

世亂干戈日夜尋可堪災沴又相侵烟霞出地皆成稷
雷電飛時肯作霖祝蜴漫勞遵故事問牛誰復軫憂心
小蟲未寤年光晚猶抱枯芳學苦吟

雨中呈石末公

去年三冬暖不雨今年孟春寒有餘大雲垂垂壓宇宙
密雪滾滾飄庭除安排白水與泛舸醞釀青泥容沒車
辛苦陌頭楊柳樹含顰等待太陽舒

和石末公見示育字韻

長想天涯皆內地忍看閩外即他鄉扶生可惜鑿無緩
救死寧堪鬼在育郡縣誅求應到骨乾坤戰伐徧成瘡
遼東華表雲間鶴相見相思總斷腸

次李子庚韻

風落餘花春事非
愁心烟雨共霏霏
溪雲不作從龍起
山石何須學燕飛
籬下舊存彭澤菊
林間新長首陽薇
夜闌忽漫聞啼鳥
腸斷天涯信使稀

早春遣懷

正月餘寒未放春
漫空飛雪舞隨人
新年對客情何限
濁酒於予意獨親
澗底流泉渾似玉
門前細草總成茵
鶴歸自愛山能靜
豹隱方知霧有神

雨中遣悶

雨清愁雲重不飛山蒸冷霧襲人衣亦知屏翳空多事
只恐羲和失所歸歲晏波濤東逝急天寒鴻雁北來稀
殘燈永夜清無焰坐聽飢猿響翠微

聞猿有感

猿響秋山夜向闌白雲如雪擁林端鍾儀楚奏難成調
蔡琰胡笳欲罷彈澤畔離騷餘怨恨已東涕淚想汎瀾
唯應華表歸來鶴明月清風共歲寒

漫成二首

沈水香銷金博山月滿樓臺深夜寒
瑤琴弦絕不可彈
葉落烏啼尋夢難

江水如天月如水落葉蕭蕭夜風起
一寸愁心千萬里
不見行人應未已

詠史

六雄糜沸擾天綱天下嗷嗷望禹湯
多事秦皇能一統
却教人憶楚懷王

天與聰明作大君應天在實豈虛文重瞳若解行仁義
不枉芒碭五色雲

題西江獨釣圖

秋風江上垂綸客知是嚴陵是太公細水浮嵐天與碧
斜陽炙面臉生紅形容想像丹青在歲月荒涼草澤空
日暮忽然聞欸乃蓼花楓葉忘西東

題墨竹

蒼梧山下無窮竹盡是湘妃淚種成烟雨不銷千古恨

佩環虛度九秋聲見愁收豎乘時代可待伶倫學鳳鳴
獨立淒涼對圖畫為君惆悵一沾纓

絕句漫興七首

一歲三春好景光紛紛紅紫競芬芳芙蓉亦有傾城色
不見東風却拒霜

風散螢光夜未分隔窓涼雨落紛紛秋衾不與還鄉夢
知雁南來獨自聞

顧兔涼生月欲沉露蛩楓葉共啼秋城烏半夜驚飛起

應為離人白盡頭

多事池邊促織兒
聲聲哀怨旅魂知
干戈滿地無機杼
長夜辛勤說與誰

伐木丁丁谷響傳
梗楠樸椒共成烟
扶桑不是人間樹
幾見滄溟變稻田

愁極每將歌當哭
歸來不覺咲成狂
蓬山縹緲鯨鯢外
一夕相思九斷腸


永夜西風嫋嫋來
露華如玉委蒼苔
碧雞啼落山頭月

腸斷槐根夢不回

送醫士賈思誠還浙東二首

西風嫋嫋水鱗鱗一曲離歌淚滿巾
殘柳數枝鷗數點夕陽江上送歸人

落木長亭獨客回蹇驢聊可當駑駘
還山須種千枝杏等待仙華道士來



誠意伯文集卷五

欽定四庫全書

集部

誠意伯文集卷六

詳校官庶吉士臣范逢恩

中書臣劉源溥覆勘

總校官編修臣王燕緒

校對官編修臣秦泉

謄錄監生臣秦鴻甲

欽定四庫全書

誠意伯文集卷六

覆瓿集六

近體詩

憶昔二首

憶昔上林花發時
黃蜂掠亂蝶參差
如今花落枯枝在
付與秋蟲掛網絲

明
劉基
撰

憶昔揚州看月華
滿城絃管滿人家
可憐今夜中秋月
獨照寒蛩泣細沙

呼燈

溽暑蒸人百體柔
中宵揮汗想清秋
西風一夜吹庭樹
驚起呼燈問敝裘

磨石岡作

磨石岡頭雲濕衣
謝公墩上雨霏霏
西風忽捲殘陽出
臨水登山忘却歸

夜坐二首

露泣寒蛩啼斷魂風驚簷鐸語黃昏
羈愁悄悄成危坐看盡空牆上月痕

蟲響莓苔葉響廊月光如雪露如霜
銅壺管領催華髮一夜應添百刻長

送別

送別江頭日欲沉落潮風急鳥歸林
秋雲恰似人情薄秋水還同客恨深

無寐

夜長無寐待鳴雞及至雞鳴夢却迷驚起朝陽斜照屋
一眉殘月在天西

棲鳥

歸雁將秋入楚天薄雲開月伴愁眠露寒葉動棲鳥起
一叫千聲落枕邊

義和

斷梗枯莖付野蒿冷風涼雨剝征袍義和只在嶠夷宿

自是金烏未伐毛

紈扇

樹頭風露咽玄蟬
錦褥新張竹簟捐
紈扇團團霜雪色
好藏篋笥待明年

寒夜

月上前山夜寂寥
江城鼓角殷寒宵
魚龍水落滄溟靜
鴻雁聲來紫塞遙
風物自應隨律轉
霜髯爭得見春消
青釭冷暗愁眠怯
樓外頻移北斗杓

漫成

愁將短髮逢搖落漫把殘燈照寂寥
兩地身心悲夜鵲五更鐘鼓夢春潮
驚寒栢葉垂垂靜向日霜華泫泫消
悵望烟塵滿長路紫芝空長故山苗

梅花七絕句

風林凋盡碧琅玕的皪梅花好自看
霜白月明殘雪夜一枝危拂斗杓寒

羣山積雪慘晴曦石裂玄冰萬木披
不是孤芳貞不撓

陽和爭得上枯枝

紫府仙人萼綠華暫拋瓊苑到天涯
斷魂應化為胡蝶
夜夜歸來阿母家

稀疎寒玉小樓東骨冷魂清五夜風
惟有翠禽憐寂寞
一雙相倚月明中

蕊宮仙子媿雲鬟姑射神人薄鍊顏
借問高標誰得似
白頭蘇武在天山

瓊跗玉葉兩依依搖落空山物色微
青女不知幽獨意

忍寒猶是妬芳菲

微陽穉綠未能還四海昆蟲總閉關只有梅花見天意

先將春色到人間

蔣山寺十月桃花

王母桃花此地栽風霜搖落為誰開琳宮玉座同黃土
絳蕊丹跗自綠苔度朔烟霞違夢想武陵雲水怨歸來
殘蜂剩蝶相逢淺黃菊芙蓉莫浪猜

雪中三首

竈下孤烟鬱曉炊
簷前寒鳥啄枯籬
瓊瑤滿地無行跡
正是袁安獨卧時

一夜雪深一尺餘
平明鳥雀噪堦除
移床漫向明牕下
圖得清光好照書

漠漠隨風結遠埃
輕輕糝地集枯荑
春前有意呈三白
知是陽和次第來

雪後遣興

朝寒布穀應時鳴
起向回廊獨自行
殘雪未消簷影寂

滿庭幽草看春生

絕句二首立春夜聞蛙鳴作

鬼門竹琯動輕灰
春色先從地底來
月落江城聞畫角
五更殘夢一時回

輕輕細雪點枯池
嫋嫋東風拂樹枝
春到草根人未覺
夜來先有蟄蛙知

憂懷

傷離驚歲宴
引望起愁端
落日烟中小
孤雲雪外寒
浮

生無限恨垂老異鄉看掩淚觀梅蕊中心分外酸

雪中有懷章三益葉景淵

歲莫懷人雪滿天飢烏病客對淒然地爐無火同誰坐
石硯生冰盡日眠栗里何時歸白髮茅簷幾處起青烟
稻畦麥隴看春及土膏泉滋識有年

白髮

白髮應同春草莖風吹一夜滿頭生欲收浮豔歸根柢
故遣芳菲定老成碧瓦曉霜憐變滅紙窓宵月妬分明

據鞍上馬非吾事，賴爾粧嚴意不輕。

絕句九首

異鄉風景不知春，滿地蒼苔一病身。
睡起無人問幽獨，杜鵑聲在綠楊津。

花自飄零草自榮，何須惆悵獨關情。
高軒日永成危坐，隔水風來聞鍛聲。

雨餘烟柳約青絲，風過芹塘澹碧漪。
正是愁來無着處，綠陰庭館暮寒時。

一樹穠華半夜風平明枝上十分空黃蜂紫蝶紛紛去
留得蒼苔藉碎紅

槐葉陰陰覆短牆微風細雨麥秋涼如何一歲三春景
不及閒牕午夢長

淮水東邊舊六朝瓊樓翠館白雲銷于今只有垂楊柳
猶似當時舞細腰

花落江皋宿雨晴野烟消盡見蕪城鳳簫一去無回日
不及年年綠草生

天塹長江似海深
江頭山鬼笑埋金
東家釀酒西家醉
世上英雄各有心

暖風吹帳日光遲
恰似清和四月時
黃鳥不知人嬾起
未明啼上綠楊枝

半山寺二首

王家廢寺舊聞名
荊棘花開鳥自鳴
深夜狐狸穿破塚
佛燈爭似鬼燈明

奸時變法事多端
氣燄興妖膽
自寒漫道諂諛堪
媚佛

竟將佛作麼人看

絕句漫興十一首

風光何故惱閒人我欲乘槎一問津
滿地綠陰迷斷夢五更啼鳥不勝春

兔葵燕麥舊人家曾唱南朝玉樹花
寒暑又隨風日轉東陵誰種邵平瓜

莫道花開便是春莫言沙漲即成津
南風過了東風起愁殺江頭待渡人

新鶯枝上語如絲似與羈魂話所思不用登樓看草色
白蘋香散已多時

相思舉目萬重雲燕去鴻來杳不聞漫說黃金能得士
只今誰是望諸君

五湖風雨夜垂綸一葉扁舟一粟身至竟雲濤歸大壑
烟波還屬釣魚人

病客無錢試藥方出門聊復信行藏爭知頭上蕭蕭髮
却與遊絲較短長

池面新荷貼小錢
荷心點點露珠圓
開花結子應堪待
亂荇空萍正可憐

嫋嫋江風轉白蘋
輕花亂蕊看成塵
誰能熱取生犀角
采石磯頭照水神

日落羣山返照餘
槐陰夢覺夕陽初
夜閒不畏更籌短
收取流螢映讀書

白鷺洲邊白鷺鷥
一雙相對立灘隄
日斜隔水分明見
不分人間有別離

漫成三首

八駿茫茫去不回
白雲歌曲使人哀
鯨魚雲起鯨鯢湧
青鳥何由海上來

瞿塘怒水激天風
回首童顏變老翁
落日長年鳴櫓過
白鷗飛出浪花中

微涼生袂一登樓
落照歸鴉點點愁
誰似孤雲獨無事
隨風直到海西頭

不雨遣悶二首

朝霞不作黃昏雨
暝靄徒為白晝風
日上高林啼布穀
聲聲只在短牆東

池上芹泥即漸乾
梁間燕子拾蟲難
綠牕無限傷春意
看盡斜陽更倚闌

雨餘

枯池得雨鬧羣蛙
蛭蟪含漿總有家
為愛微涼宜曉夢
不知晴日滿庭沙

無題絕句

花自飄零水自流無情有恨月如鉤十年一枕三更夢
贏得風烟滿地愁

後夜蛾眉約淺黃河邊猶翳玉繩光不知何處藤蘿上
全見姮娥一面粧

春蠶

可笑春蠶獨苦辛為誰成繭却焚身不知無用蜘蛛網
網盡飛蟲不畏人

晚興

腐草餘光滅又明微風不起夕涼生絕憐一餉池塘雨
只得青蛙半夜聲

睡起

濃綠當軒日上遲病身只與睡相宜覺來却怪莊周蝶
繞盡殘枝過別枝

喜雨寄夏允中五絕

好雨知時五月零豆苗瓜蔓一時青老夫亦起中庭立
兩眼看天似醉醒

隱隱輕雷不起風濛濛密雨遍長空枯根發秀新莖長
小草那知造化功

渙汗如蒸被體流日高強起倦梳頭多情一夜千山雨
消盡人間萬斛愁

水鸛長嗥應九陵山雲處處上如蒸定知谷鮒從今後
不向西江乞斗升

江暗天低雨脚垂屋鳴簷瀉入枯池却憐似鏡新荷葉
不見魚跳鷺浴時

無題

槐映高樓柳映墀
風來惟有鵲先知
長應別殿黃昏後
記得金宮妬寵時

漢世祖

白水龍飛紹赤精
鳴皋盡入大官羹
三驅只貸樊崇死
侯印應慙不義名

涼夜

瀟瀟涼雨瀉簷瀧
聒聒鳴蛙似吠厖
惟有露螢憐寂寞

却將光景到春牕

五月十九日大雨

風驅急雨灑高城
雲壓輕雷殷地聲
雨過不知龍去處
一池草色萬蛙鳴

次韻和劉彥箕憶山中篇

句曲峯高倚太陽
不風巖谷自清涼
四時嵐彩霏瓊雪
百道泉流湛玉霜
雅稱采芝追綺季
尤宜散髮學嵇康
龍鱗璀璨松當徑
鳳尾襴褸竹過牆
月上海門蟾覺早

露寒天宇鶴先嘗
仙人卓劍降魑魅
道士書符禁獠狂
寶氣丹光生夜寂
黃精白朮引年長
茅君虎卧瑤壇上
蕭史鸞樓碧殿旁
桂樹寒山違謝客
桃花流水憶劉郎
猿猱任占青蘿帳
薜荔從生綠石床
世難有身空自累
詩成無雁倩誰將
欲憑錦瑟傳幽思
才理朱絃意已忘

殺氣

殺氣乾坤黑
陰氛日月黃
已成心曲亂
不復鬚毛蒼
夜哭城笳裏
朝烟野戍傍
扶傾無郭李
何地尚耕桑

愁感代哭

燕鴻北去又南來，斷壠荒岡幾劫灰。
慈母磯寒風落木，望夫石老雨添苔。
江流定與天河合，客淚還經地底回。
未必春光便銷歇，白華猶發燒殘梅。

江行雜詩

采石江頭山插天，江泉激石鳴湘絃。
十年戰血污江水，水中鬼神應醉眠。

三生磯上星滿灘，白烟如雪浮林端。
水妃夜解玉佩去，

清淚滴成紅水難

馬當之山中江中其下乃是馮夷宮良宵月出江心底
行人喜甚天無風

九龍山西西日沉江雲壓地生層陰汀洲無人蘆葉響
咆哮一聲風蒲林

皖口孤城江水傍城上猶有愁雲黃豺狼魑魅相食盡
忠魂白日長垂光

桑落洲邊春草生宜城九醞空傳名百年世事同醉夢

愁聽野猿啼到明

江盤峽束雷彭浪孤山如筆江中央坤靈不放厚地裂
應有朝夕通扶桑

長江水濁湖水清石鐘濤擊鯨魚鳴山頭出雲山下雨
揚瀾左蠡何時平

江州太守文儒宗罵賊就死真從容天翻地覆元氣在
斯人萬古其猶龍

望孤山作

落日千山赤寒烟一島青
羈心霜下草生態水中萍
黃屋迷襄野蒼梧隔洞庭
空將垂老淚灑恨到滄溟

青絲馬

蹀躞青絲馬艱難赤伏符
窮陰歲欲暮落日鬼相呼
見雁愁心裂看天淚眼枯
殷勤夜深月還照旅魂孤

十二月一日

耿耿夜不寐源源憂思來
歲餘三十日腸定九千回
江響風初發天昏月未開
白頭真合得非是楚猿哀

古戍

古戍連山火新城殷地笳九州猶虎豹四海未桑麻天
迥雲垂草江空雪覆沙野梅燒不盡時見兩三花

寄黃仲美

二十年前別故人乾坤何處不風塵玉缸阻對簷花夕
素髮羞同野草春紫極星辰空有象青冥波浪杳無津
歡華過眼成今昔苦憶元方淚滿巾

春城

春盡江城不見花似知白髮畏韶華
戰爭故習俱無賴
喪亂餘生未有涯
三島虹蜺昏日月
二儀風雨化龍蛇
何年百谷歸滄海
尋取河源泛客槎

舟中

雨翳青燈靜客舟
輕寒只戀敝貂裘
漫山薄霧穿牕濕
漱石鳴泉拍枕流
身在壺中天
萬里夢驚華表鶴
千秋愁來滴淚都成血
直到滄溟水盡頭

彭澤阻風

風急雲飛江倒流請君聊且駐蘭舟
浪翻彭蠡蛟螭橫雲壓匡廬虎豹幽
懷古漫尋元亮菊望鄉空倚仲宣樓
五更歸夢三千里一日迴腸九萬周
嘯侶山棲憐野鹿伴人水宿感沙鷗
中元都府神官會上界星辰積氣浮
地軸西南連少昊天關東北鎮陽侯
兩峯對擁青螺髻孤月初生白玉鉤
龍甲冷欺獰蜃市蚌胎光奪睡龍眸
春撞急杵濤驚枕滴瀝真珠霰洒凋
枯樹掛崖眠復起老藤牽石墜還留
宮商調合靈鐘夕銚鏐稜高峭壁秋

繡被焚香寒悄悄金環扣瑟夜悠悠竹枝寫恨傳巴女
水客長吟答楚囚不寐殘缸猶閃滅動情鳴櫓數啞謳
蒼梧鳳逐重華去赤水珠無罔象求大宅高門荒町曠
頽垣敗塚鬧鵲塵埃漠漠城笳怨蘆荻蕭蕭戍鼓愁
鬼火碧穿燈火去狼烟黃入燒烟道紫芝可茹林多蟒
紅鯉堪罾澤有虬萬國鋤犂俱劍戟八陵松柏讓戈矛
哀哀野哭乾坤慘踽踽途行面目覩永憶盧敖翔汗漫
願隨慧遠學清修瑤臺青鳥歸何處玄圃琪華爛莫收

滄海未容精衛塞蓬萊定許偓佺遊故園梅蕊相將發
倚賴春陽慰白頭

冬至

冬至微陽斡化機閉闕獨坐正相宜白楊風掃經霜葉
翠柏冰凝泣露枝日轉天南林影覺春生地底水泉知
物華過眼成今古愁絕看雲有所思

鍾山作十二首

紫桂吹香媚小山月華的皪蒲林間坐來涼氣生虛室

知是山雲作雨還

松露滴堦星在天
草蟲相吊響如絃
寶公塔上西風急
半夜林鴉不得眠

九月江南葉未黃
空山松柏夜深涼
玄蟬且莫催徂景
留取幽蘭作晚香

玄武湖中草自秋
石頭城下水長流
繁華過眼成今古
更與牛羊競一丘

春去秋來榮復衰
花殘葉落總堪悲
誰能句曲山中去

乞取茅君一虎騎

北斗闌干夜未央
鐘殘虛牖出天香
佛燈相對坐宵寂
墜露滿林生白光

一炷清香一卷經
世間無事是山僧
何須更卓飛空錫
長使時人恨不能

月落山空霧未開
風生咆哮虎響如雷
樹頭驚鵲相呼起
欲下還飛一百迴

白雁蕭蕭柿葉紅
野花開盡六王宮
空餘一道秦淮水

着意西流竟向東

策杖登山信早涼
山花澗草總能香
捫蘿抱水歸來倦
不掃蒼苔卧石床

嫋嫋西風散白蘋
冥冥落日起黃塵
青娥不分秋客寂
故染楓林似老人

槁葉含風彈夜絃
蟬蛩淒唳答寒蟬
雞鳴埭上繁華子
莫向秋霜惜盛年

歲宴

歲宴悲風急空江白晝陰黃蘆與紅蓼無處不傷心

遣興

白露如珠滴素秋啼蜚絡緯寂然收烟開碧水浮天遠
月帶銀河入海流艷艷霜林張綺繡瑋瑋風葉落鳴球
此時旅客篝燈坐無奈黃昏一餉愁

搖落

搖落江天氣慘淒野黃雲白感東西可憐飢鼠當人立
無奈寒鴉向客啼杳杳夕陽葭浦闊茫茫秋水稻田低

銷魂何地歸衰疾觸處烟塵沸鼓聲

秋夕

柏葉蕭疎柳葉黃露華如玉綴空廊
丹心欲共燈花結白髮偏隨漏水長
月色故園同窈窕蟲聲此夜獨淒涼
寒鴉莫更啼金井衰病能堪幾斷腸

淳安舟中遇雨遣悶

一夜青山雨平明黃濁喧
亂流翻地軸高響落雲根
鍛羽投林鳥啼飢抱樹猿
羈懷正愁絕感物重銷魂

溪雨細如霧北風長夏寒汙池不赴壑井谷自成湍蘭
茝馨香盡魚龍世界寬斜陽在林樹時復捲蓬看

秋興二首

嫋嫋西風起白蘋妖紅媚綠看成塵九衢車馬如流水
盡是邯鄲夢裏人

梁間燕子去悠悠絡緯寒蟬管領秋誰遣莊周化胡蝶
不勝憔悴為花愁

題山水小畫二首

鄂渚輕舟未發
瀟湘倦客多愁
可恨一江春水
無情日夜東流

碧草桃源路斷
紫芝商嶺雲深
高樹月明啼鵲
一聲一度傷心

題畫竹

葉間重露猶滴
林表寒烟未開
想見沅湘江上月
明環佩歸來

銘頌箴贊

梅公頌并序

吳興章仲文築室花谿之上環植梅焉命之曰梅花之
莊子與仲文交敬其好學而知德也知其有取於物不
徒矣乃效屈子頌橘之體而作頌曰

朱方之秀梅實碩兮含章而貞受命獨兮扶疎櫛森清
以直兮玄冰沍寒不撓其節兮玉之潔兮夷之特兮閉
而發兮芳郁烈兮黃中絳跗美而完兮麗而不淫物莫
能干兮冬榮夏實含陰陽兮青黃纍離以和羹兮文質

彬彬德之儀兮君子之象君子之宜兮

尊聞堂銘

皇降恒德我儀受之情牽物交民鮮克有之卓彼聖哲
有聞于先弘猷秩昭纘緒維賢凡有所聞恭敬奉持造
次必將屋漏勿欺洋洋鬼神兢兢震霆寢斯食斯或敢
弗承厥聞伊何闕疑擇善靡聖天只克念不遠人亦有
聞罔知所擇楊墨仁義乃德之賊亦既擇止罔知所尊
郭公善善國喪身奔聞義必為聞過必徙能尊能行是

謂君子戴生有堂扁曰尊聞用宏厥理昭以銘文

順齋箴為夏仲珍作

二儀茫茫繫理是物判以兩途維逆與順理之所在漠
乎無形曷予求之即事以明利劍吹毛不柄之持北轅
適粵徒勞何為堯舜理物因利除惡鯀堙洪水曩倫攸
斁勢順則強氣順則舒天地順動百度弗渝待時而行
處順以守君子作箴敢告左右

敬齋銘

并序

敬齋者篤列圖彥誠所以名其居室也彥誠以科第發
身其於敬字之義蓋亦講之熟矣則舉其所知而行焉
可也又何必多求乎人之言哉乃勉而為之銘銘曰
莊其外而肅其內瓊裾玉佩無顯無昧惟鬼神是對肆
遏蹶弗愆以不越載以永無有悔

守口如瓶箴

吳君以時書守口如瓶以自警徵予言為作箴曰
維人有口瓶亦有口瓶口弗守喪厥受人口弗守速厥

咎口乎口乎其禍福之門而一身之樞紐乎人有瓶也
尚克固之胡然有口而不知度之維言如泉維口如隄
有出弗稽為河為谿激石揚泥追不可回故曰好言自
口莠言自口又曰君子無易由言耳屬於垣守口如瓶
永矢勿譖

奎上人耘杖銘

奎上人得古藤以為杖而置鋤焉將以兩其用也名之
曰耕杖而劉基為之銘曰

罾可以取魚而不可以繫駕帶可以繫襦而不可以貫珠孰眇其癰而多乃需既予老是扶又歲莽之除俾康勿起以弗迷厥塗杖乎杖乎歲月逝夫子也予俱

敬齋箴

并序

蒙古氏宗道之先出自山西而以儒世其家故名其燕居之室曰敬齋載世德也先正有言曰經禮三百曲禮三千一言以蔽之曰毋不敬敬也者其萬事之根本與故聖人之語君子惟曰修己以敬故禹湯以克敬而王

桀紂以不敬而亡自天子至于庶人豈有異哉故曰穆
穆文王於緝熙敬止又曰昊天曰明及爾出王昊天曰
旦及爾游衍敬也者不可須臾離也宗道勉乎哉克念
作聖而已矣作敬齋箴其詞曰

心敬則存而不敬則昏事敬則立而不敬則跲克臧自
我否臧自我如之何以可維謐維專式莊弗儼臧之淵
淵出之虔虔俾中不偏有握勿捐既悠既堅無不顯或
愆無息弗乾熟之者聖守之者賢故曰敬勝則吉怠勝

則滅敬而無失聰明睿智皆由此出事神治民舍是無術是用作箴以謹燕昵

朱伯言硯銘

礪而容既澤既龍輶俾椎以為鋒克相子工廠惟爾庸子所弗工維子之慳慳式蠲沒以攻無貽爾懞

紹興能仁寺鐘銘

并序

嬾翁禪師既住大能仁寺之明年新鑄大鐘成括蒼劉基銘之曰

赤堇之金耶溪之銅弗鏹弗鋒而以為吾鐘擬之鐺鐺
靡幽不通以暢八風闔陰闢陽式贊化功於萬億年與
皇家相為無窮

醒齋銘

并序

醒齋者蘧君德芳所以自名其居室也蘧君少嗜酒數
為酒所困一旦忽思古人之所以喪其身覆其家者大
率多於酒遂絕旨酒而以醒齋署其居用以朝夕警省
而杜其欲於將萌也括蒼劉基聞而喜其善修慝也故

為之銘使揭于楣且以堅其志云銘曰

禹疏儀狄祗承虞帝湯做酣歌用永厥世維衛武公初
筵有詩年踰九十令聞不隳在魯仲尼酒不及亂範模
萬古愈久彌粲羲和酒淫盾后徂征楚國皆醉鄢郢榛
荆次公北闕仲儒東市狂談酗罵身戮家毀吾以是知
昭昭生于惺惺而憤憤出于冥冥劉曜受執孔融被刑
莫不因此以殘其形古稱覆轍後車勿蹈有縱弗防禍
生所好人孰無過弗改維咎知過而改何過之有維敬

與怠狂哲攸分敬醒則存不醒則昏于嗟蘧君以我諄諄止爾醺醺有茁弗芸視此銘文

靈峯寺植木贊

靈峯寺有松杏與樸並植焉劉子見而感之為作贊曰
杏葉葱芊有子可以實籛松枝扶疎有苓可以引年樸
狀如樗衆蠹所穿擁腫液瞞不可以鑄胡並植于庭混
厥醜妍明堂求材殷趨爾先松戕杏割樸獨宛然嗚呼
樸乎孰女之憐維女之全抑棄於人乃獲乎天耶

畫龍贊

鯨其角蒼其鱗蚬蚪其身胡為乎而神至陽之精健與
天倫形而求之惡識其真于嗟龍兮

官箴上

維天生民儷儷蚩蚩有欲罔制迺弱迺螭爰立之君載
作之師式養式教毋汨秉彛嗟爾司牧代君撫綏君祿
我食君令我施邦本弗固庶事咸墮受寄匪輜敢不肅
祇治民奚先字之以慈有頑弗迪警之以威振惰獎勤

極艱息疲疾病顛連我扶我持禁暴戢姦損羸益虧如
農植苗蚤夜孜孜澇疏旱溉無容稗秕如良執輿順以
導之無俾旋漳彊策以馳慈匪予愛帝命薄時威匪予
憎國有恒規弱不可陵愚不可欺剛不可畏媚不可隨
無取我便寘人于危無避我謗見義不為天鑒孔昭民
各有思惠之斯懷推之乃離譽不可驕器惡滿歆謗不
可怒退省吾私人有恒言視民如兒無反厥好以暴子
知是用作箴敢告執羈

官箴中

在昔隆古分封國都付之以民俾養勿瘠上下協心各保乃區明庶考績昭哉範模秦廢聖制代德以徂刀筆之權始歸吏胥弄法舞文聾癡瞽愚流波至今一任簿書行立公庭如雁如鳬我欲是求我利是趨摩揣官情以逞覬覦官惟好貨我甘以苴官惟好名我逢以諛官惟畏嫌我疑以汙官惟好情我淫以娛官惟好猜惑以多途官惟好威道以掊搯語默有為俯仰有須覘容察

辭助忿乘愉法度盈口奸邪滿軀蟲智迷昧欺庸陷迂
俾好作惡以紫為朱未獲官心嫗嫗儒儒亦既獲止如
登天衢傲兀民士憑陵里閭惡積禍來官與之俱人有
恒言遇吏如奴堅防固隄猶恐或窬矧曰聽之百姓何
辜是用作箴敢告僕夫

官箴下

無謂余明人莫能昧離婁善察不識其背無謂予能人
莫敢欺校人烹魚子產弗知立事惟公燭詐惟誠小節

勿固小慧勿行無矜我廉守所當為無沽我名以生衆
疑何以簡訟決之使通何以弭貪慎檢乃躬去讒斥佞
遠吏近民待人以寬律已以勤無咎人弗信恍至斯乎
無患人不聞惟德不孤德以進善威以挫姦德不可偏
威不可煩無謂彼富我必極之無謂彼貧我必直之持
心如衡以理為平無為避嫌以縱無情人有恒言為臣
不易是用作箴敢告有位

王原實裕齋銘

會稽王厚實以裕名其齋括蒼劉基為之銘曰

寬而舒綽綽乎有餘佩裾與與有容弗据德人之間過者式諸

連珠

擬連珠六十八首

蓋聞空谷來風谷不與風期而風自至深山園木山不與木約而木自生是故福不可徼德盛則集功不可幸人歸則成

蓋聞志大業者必擇所任抱大器者必擇所投是以梁
江湖不取螭殘之木釣鯨鯢不適雨盈之溝

蓋聞急雨之漲可以決山及其息也得坻則止怒馬之
奔可以超壑及其憊也歷坎而瘡是以長平之威報在
鉅鹿會稽之勝終于姑蘇

蓋聞身無恒守勢窮則屈心無定主情急則親是以失
時之言每多謙已墮井之呼不暇擇人

蓋聞石不亂玉惟瑊玦為能亂玉梟不混鳳惟鸛鷀為

能混鳳故妖聲治色君子遠之必嚴偽行辯言聖人懲之必痛

蓋聞鑒能照物翳之以塵則不可照水能澣物淆之以泥則不可澣故身明明斯可以使人明明政緩緩不可以責人緩緩

蓋聞神龍未雲沕淵淪而無悶凡魚得水里罔罟而莫知是故聖哲識時以遠悔吝愚蒙競利以冒傾危

蓋聞物無全材適用為可材無棄用擇可惟長故一目

之人可使視準五毒之石可使潰瘍是以穰苴治師智
勇貪愚咸宜其任公輸構厦棟梁枅桷各得其良

蓋聞神龍可縶而不能使之去水飛黃可駕而不能使
之捕狸是故舍人之能而強之以其所不能則叛奪人
之好而遺之以其所不好則離

蓋聞民情本質文過則偽人道本直慮佚則傾是故聖
人制禮因自然之序哲士用智利不息之貞

蓋聞觀形于聲未必見形求實于名未必得實是故飄

風不可以調宮商巧婦不可以為家室

蓋聞物有甘苦嘗之者識道有夷險履之者知是以宴安日久詰戎兵而聽者忽忽老成人喪語典刑而聞者嗤嗤

蓋聞物無專美用之者貴人有異欲諧之者從故冠纓不可以服鹿而韉鞵不可以馭龍是以合抱之松無庸於埽人之國若甕之繭見棄於裸體之邦

蓋聞千斤之象不惴虎而惴鼠三寸之蝎不蠹棘而蠹

松是以制必取其所畏防必究其所容故能不震而威
于斧鉞不勞而固于垣墉

蓋聞國不自富民足則富君不自彊士多則彊故媚嫉
之人庸則士隱而君獨培克之吏進則民夷而國傷
蓋聞春原之草拔盡復生夏厨之蠅驅去還集故時未
至不可以彊爭勢方來不可以力戢是以善撲火者不
迎其烟善防水者不當其急

蓋聞萬物並育不齊其用而各有用五氣迭運不同其

功而皆成功故良珠夜光不假醵于明燭秋華發彩不
爭榮於春風

蓋聞魚無定止淵深則歸鳥無定棲林茂則赴故以道
養賢則四方之民聽聲而來以德養民則四方之賢望
風而慕

蓋聞剔大蠹者木必鑿去大姦者國必傷是故剖腹漸
腸不如無病決躡解腕不若豫防

蓋聞日月勞其軀而寒暑成君相勞其心而天地位是

故宵衣旰食大舜所以致其憂手胼足胝神禹所以忘其貴

蓋聞仁暴殊途非暴無以為仁之啓怨恩異路非怨無以為恩之資是以赤日流金嘉樹之陰穆若玄冰裂石春陽之德煦如

蓋聞制萬變者在乎專察萬微者在乎定故衆輻寄身于一轂而衆物納形于一鏡是以人心無貳而鬼神不違王言如綸而兆民悉聽

蓋聞勢有所格則小柔可以服大力形有所格則大猛不能破小堅是故食人之虎不能吞一蝟牽羊之綆可以御九犍

蓋聞太陽未升爝火與流螢並照繁霜未降薜花與小草同妍是以蛟蜃之市不可以稱有國稊稗之秋不可以言有年

蓋聞冬華之水春不必實早慧之子年不必壽故良工鑄金忌其踴冶智士懷材貴乎藏秀

蓋聞植善傾惡天道之定好安惡危人性之常是以順
天之道則人歸而王逆人之性則天怒而亡故伐罪弔
民而周祚延于孫子興徭樹怨而秦禍發于蕭牆

蓋聞拂雲之松生于一豆之實縱壑之魚穿于一絲之
溜是以忽小事者禍必盈輕小敵者亡必驟

蓋聞善賈者不壅其貨善治者不壅其民故政壅則奸
生于國氣壅則瘍生于身是以山澤不壅而雨暘時若
天地不壅而人物皆春

蓋聞大明普照魍魎鼠惡其眯目毒霧揚氛蝮蛇喜其得時是以堯舜至仁而三苗不服桀紂極惡而多罪皆歸蓋聞執駭馬者不與並逐救危舟者不與同喧是故止鬪而平其氣則爭可息聽訟而平其心則事不寃

蓋聞剪紙為墻不可止暴搏沙為餅不可療飢故灼灼之言終非實惠僕僕之拜徒爾多儀

蓋聞時有未至非力所及情有未孚非言可親是以見疑之璞三獻而取刖足不鳴之鳥三年而後驚人

蓋聞人非大聖鮮有全材君欲任賢當如用器惟能避
短而庸長乃克奏功而濟事是故駢駟駟以之運磨
不若蹇驢之能干將莫耶以之刈草不若鈎鎌之利
蓋聞俗有厚薄運有廢興故去偽就真者盛之兆捨實
徇華者衰之徵是以豔舞妖歌末世所好奇技淫巧先
王所懲

蓋聞理亂絲者必凝其志治亂國者在定其趨是故三
軍一心劍閣可以攻拔四馬齊足孟門可以長驅

蓋聞能盈而不能謙者雖成必隳知進而不知止者雖得必失是故附羸以升高而枯蠃蠹以任重而躋

蓋聞百廛之市不畜噬犬八家之井不畜舐牛是故士有悍婦則良友不至國有妬臣則賢士不留

蓋聞蛭螭之藪神龍不棲蒿荻之區嘉穀不植故秦庭虎視而芝歌逸響于商山周澤鶴鳴而紫氣流光于西極

蓋聞物有準則心為權衡非定靜之有素必紛拏而起

爭是故坐舟視星當察其曷轉執斗較斛當審其孰平
蓋聞奔馬之輪拳石礙之而格迅川之水束草投之則
凝是以一星見變能使九服同災一脈爽和能使百體
俱病

蓋聞淵之深者流必緩聲之大者響必悠是故政以漸
成則民不駭俗以漸變則功不偷

蓋聞植嘉穀必以糞壤鑄洪鐘必以土型故物無必賤
而賤不可輕是以海納污然後成其大君納衆然後保

其榮

蓋聞大器非一人之私大事非獨力所建是故利不及衆所以起天下之爭爵不求賢所以萃天下之怨

蓋聞心有所憂當儆於事事有所害當慎於為故愚人畏病而常病智士防危而不危

蓋聞驕者諂之招故諂集而賢路塞暴者貪之使故暴用而怨府開是以榮夷操軸而若神之嚴棄社稷以如莽來革東權而如燬之室與珠玉以同灰

蓋聞明鏡照膽不啓隴廉之顏長劍拄頤不稱侶僥之
服是以狂歌之士遺世若草萊茹芝之老比身如鴻鵠
蓋聞嗜有所專則姦從而入長有所屬則惑由之生故
徇功利者不虞諂詐溺鬼神者獨覺形聲

蓋聞暴於物者衆志之所誅妨於衆者輿情之所疾是
以虎狼墮甯仁者見之而不憐枳棘當道行者過之而
必詰

蓋聞截牛之角而呼為豕則雖庸必駭染鷺之毛而指

為鴉則雖愚必疑故欺心之言祇足以招天下之怪掩耳之噪適足以致天下之嗤

蓋聞甘雨祈祈不起斷根之水長風烈烈難行折舵之舟故渭濱星殞孔明力殫于興漢洛都鼎震萇弘志屈于扶周

蓋聞天不掩賢而神人之道不睽君不忌言則上下之情無蔽是故周史陳詩而八百其年秦令禁語而一二其世

蓋聞天下有道則貴者勞而賤者佚天下無道則貴者佚而賤者勞是以弼亮惟寅而萬姓協睦姻婭媿仕而四方繹騷

蓋聞無輿馬者不恥徒步無魚肉者不厭菜羹故性為欲汨則亂心為物動則爭是以絕外交則可以守淡泊專內視則可以全淳精

蓋聞虎之躍也必伏乃厲鵠之舉也必拊乃高是故學必潛心然後可以有得藝能時習然後不為徒勞

蓋聞龍涎螺甲以臭為香苦鹵酸梅用藥作味是以五氣交感善調則收駿功五材相成善用則獲美利

蓋聞穴蟻不知飄風巢鳥不知湧溜是故閱之子患不識稼穡之艱難山林之士患不識禮法之去就

蓋聞方石不可以為磨直木不可以為輪故至情有時而當隱正論有時而不陳是以明夷利貞箕子以之處已危行言孫尼父以之誨人

蓋聞大亨不以有鼎鴈而棄釜鬻大祭不以有犧牲而

遺韜醢是故馬服將趙而破秦用許歷之言子房佐漢而勝楚由董公之啓

蓋聞夔屈求伸非終於屈龍潛或躍匪固于潛是故勾踐事吳乃成姑蘇之舉夷吾佐霸曷問檻車之嫌

蓋聞陰陽之用道妙所憑剛柔之變鬼神所蟄故陽有闔而陰有開剛可潰而柔可立是以玄冥凜冽而水結成冰赤燁熇炎而金流為汁

蓋聞以殺止殺聖人之不得已以暴易暴悍夫之無所

成故牧野倒戈而三軍之役不再陰陵失路而百戰之
功盡傾

蓋聞知風莫過於老駝識路莫逾於老馬是以家有老
僕則故物不委諸途國有老臣則舊章不求之野

蓋聞道有窮通非智可勝名有得喪非力可成故無顧
乎外不必其身之絕謗無求於物不必其言之果行

蓋聞譎不可恃人覺則窮偽不可長情見而極是以剪
綵為葩不可以受風雨畫布為函不可以當戈戟

蓋聞侏儻之舌可習而變矇瞍之目難滌而明故教可行於質近而道難化乎性成是以御龍之智不能訓猿以禮神農之聖不能服豕而耕

蓋聞有形之器欲虛惟虛則可以納理無形之理欲實惟實則可充器是故性無不誠然後能主一心心無不明然後能應萬事

蓋聞救天下之紛紛者不拘細故成天下之亹亹者不矜小功是故剗爛肉不為利刃貫髀體不為良弓

蓋聞積倉之家獨喜凶歲舞法之吏不樂治朝故民由此困而俗由此澆是以去奢尚儉明君所以弭邪侈澄心省事哲王所以清煩囂

序

王師魯尚書文集序

尚書王公師魯文集二十有八卷公卒之四年浙西廉訪司僉事王君宗禮經歷王公威可訪而輯之版行于世浙江行省參政趙郡蘇公命劉基為之序序曰言生

于心而發於氣氣之盛衰係乎時譬之於水由根本而有華實也木之於氣也得其盛則葉茂而華實蕃得其衰則葉萎而華實少至于連林之水係于一山谷之盛衰觀其水可以知其山之氣文之於時猶是也三代之文渾渾灝灝當是時也王澤一施於天下仁厚之氣鍾于人而發為言安得不碩大而宏博也哉三代而降君天下之久者莫如漢漢之政令南通夜郎邛僰西被宛夏東盡玄菟樂浪北至陰山涵泳四百餘年至今稱文

之雄者莫如漢其氣之盛使然哉漢之後惟唐為彷彿則亦以其正朔之所及者廣也宋之文盛於元豐元祐時天下猶未分也南渡以來朱胡數公以理學倡羣士其氣之所鍾乃在草野而不能不見排于朝廷其他萎弱纖靡與晉宋齊梁無大相遠觀其文可以知其氣之衰矣有元世祖皇帝至元之初天下猶未一也時則有許劉諸公以黃鐘大呂之音振而起之天將昌其運其氣必先至焉理固然矣混一以來七十餘年際天所覆

罔不同風中和之氣流動無間得之而發為言安得而
不雄且偉哉公生至元間自幼好學為文仁宗皇帝首
開科舉公即以其年登第其涵濡漸漬非一日矣故其
為文有中和正大之音無纖巧萎靡之習春容而紆餘
衍迤而宏肆不極于理不止粹乎其為言也後之覽者
得以考其時焉公之歷官行事自見國史故不著

送高生序

高生以敬學科舉業將從師于閩過予請言以相其行

生年甫弱冠去鄉里違家室以求師于千里之外其志可謂勤矣韓子曰業精於勤生既能之矣尚何待予言以相之哉抑予之所以勉生者又有出于此之外也聖人作經以明道非逞其文辭之美也非所以夸耀于後世也學者誦其言求其義必有以見于行問之無不知也言之無不通也驗之於事則倂焉而背馳揭揭焉不周於宜則雖有班馬揚韓之文其於世之輕重何如耶生燕南人也國朝興科目燕南人屢嘗為舉首矣安知

異日不在生乎故用是以為之規也

雙清詩序

雙清軒者東山壽聖寺物外上人之所營也上人名崇超物外其號也寺在杭州城東四十里其會曰湯鎮軒所儲無他物有水一泓竹一林上人日與之為徒故遂以名其軒也夫天下之清者莫如水有節而貞者莫如竹伯夷以節立行而其清至于聖則物之清者又莫竹若也夫人與物性情之相得者各從其類物之所處不

同則清者有時而污非其情之本然也今之人達而用于世則役於事窮則役于衣食無憂者莫如僧故能遂其情而物之託焉者亦得以全其性也然則上人雖欲自外於物而物不能外之也有詩一卷上人作而同聲氣者和之也書而揭于軒者故翰林學士吳興趙公為之序者括蒼劉基也

送蘇參政除大都路總管序

并詩

至正九年冬江浙行省參知政事蘇公奉旨入為大都

路總管浙士民咸歎惜願留而不可得夫浙於江南為
大藩租賦所入半四海內京師輦轂之下為治莫難焉
其尹亦必極天下之選朝廷之意固不必有所偏重矣
京城之內密邇清光明試考績不待詢于岳牧京尹冠
冕守令遠近之所觀式得其人則由中達外四方將以
之而化不亦偉哉以公之宏才大德與其施之于一方
孰若達之于四海也然則惜公之去者其私情而樂公
之行耆天下之公心也故相率為詩以餞公且以霖雨

思賢佐丹青憶老臣為韻所以思公之德而不忘顧公之澤及于天下也詩曰

鳳凰集梧桐和聲協虞琴神蛟躍天池四海仰為霖聖人握金鏡哲士儀朝簪輝光照中野聲價重南金昔佩使者符獻納申官箴再參藩垣務清風淨氛祲煌煌京城內連袂成春林剽劇徠長才天眷赫照臨王畿一以正萬國罔不欽克符臯夔業垂名耀來今

郭子明詩集序

郭君文德字子明廣平人也讀書好為詩有交於前無
不形之於詩其憂愁抑鬱放曠憤發歡愉遊佚凡氣有
所不平皆於詩乎平之是故飲食非詩不甘坐卧非詩
不安應人接物非詩不能攄其中懷至於顛沛造次夢
寐想像莫不有詩思天下有一事一物不入吾詩若已
有所歉焉於是北眺燕代西踰岷峨南浮江湘東覽齊
岱困窮迫阨寒暑枯濕舉不足以搖其中而惟得乎詩
可以解憂其為詩也不尚險澀不求奇巧惟心所適因

言成章而其自得之妙則有人不能知而已獨知之者
蓋孔子所謂好而樂之者歟余嘗歎世之人汲汲以趨
祿利有所好樂則決性命以赴之朝奔夕馳所在皆是
今子明乃違衆人之所務而獨好我之所好得之不足
以療飢寒而失之無傷於其身彼之不顧而我則為之
蓋有所感激而自異於人以為高也是固非俗子所能
識也

送別燈和尚還鄉序


并詩

有浮屠氏踵門而求見予方以事出不得見明日復來
問其鄉則世為括人與予為同州故其心尤惓惓焉將
歸求言以贈其行夫浮屠以離世絕俗為教父母兄弟
且不得為其親也而獨惓惓於鄉人焉何哉今之人同
里巷以居而有不相接者及其遇于他方不啻如見骨
肉所適愈遠則其情愈親是乃人心之所同非待乎矯
揉勉強為也浮屠氏割慈忍愛以為高宜殊乎人而師
獨不然是蓋有見於道者也則其為浮屠也豈果惑於

其術之說而為之哉世治不古為民者日困農疲于耕而終歲不飽其食工疲于作而終身不得休息士不諳於時而累累無所即追呼徭役之可憐誅求徵歛之無厭皆足以累其身愁其心求全軀而苟安舍是其何之乎若師者其迹於是而心則有所寓乎余既重其敏慧又嘉其敦鄉人之誼故為之言且繼以詩師名復祖別燈其號也詩曰

閒居寡塵務遂與嬾情親扣門報有客喜見同里人相

知豈必素鄉語情自真北風吹大江寒水波龍鱗話別
一何速令我生苦辛故山到何時溪梅照新春親朋或
見問為道長清貧



誠意伯文集卷六